

Albrecht Hugwitz, Caspar Nostitz, Merten Maxen, Andres Tucheritz. Vnnd ist vnser eid angesehen. Das wir konig Mathien gehoulet haben, zcu helffen widder alle menschen. Vnnd von der cron was vmer mehr das sihe fil geredt vnnd gehandelt. Vnnd ist den Mannen entlich abgesagett, mit enen nicht zustehenn ouch mit Slesiern vnnd Lusatzern nicht zcusamme zcu kommen, vnnd allen eidgenossen (?):¹⁾ Sunder entlich sich erlich vnnd fromlich by vnserm g. h. König zcuhalten. Das der Stette feste meynung vnnd wille gewest ist.

Sunder des Königes Lewte were wir nicht ghörende widder eyn land vnnd stette: Ess were dann das vnser finde vnns bedrangen welden, so muste wir dy vnnd ander zcu hülffe nehmen. Vnnd ap sihe vor sich zcu den landen sich finden welden, welde wir mit dem lande zu tage kommen vnnd vns dorjnn halten noch billikeit.

Vff dem tage ist gewest M. Johan Frawenburg vnd Er Peter Waldaw.

Actum vts. anno etc. lxxvij^o.

57. Herr Steffann von Zopalienn, dy zzeit Hauptman in Slesienn vnnd Voit disser Lande, hot Friberg bey dem Fürstenstain Ingenommen, Dor noch etzliche Landsessen gefangen, vnnd dy allenhalben gross beschediget. Ouch etzliche Reisigenn genn Lemberg gelet, widder dy vffm Lehennhawse.

Dy zzeit hot em vnser g. h. König zcu hülffe gesandt an Reisigen vnnd Drabanten by ii^{j^m} menschen.

Dy zzeit ist Peter Koppe von Lemberg irschossen.

Actum circa Dominicam Judica, Anno etc. lxxvij^o et alia multa (23/3 ○).

58. Weitfur vnnd Nyderloge zcum Hayne. Anno etc. lxxvij^o. habenn die Herrn vnnd Fürsten von Sachsenn geschreiben an dy vonn Erfurtt. Wy sihe fort dy Nyderloge des Weits welden habenn zcum Hayne.

Dorumb fil mühe vnnd erbit gewest ist, vonn den von Erfurt vnnd Gorlitz. Dorvmb ist auch der Herr Bischoff von Breslaw, Herzog Gindersich vonn Glotz, Herzog Fridrich von Lignitz, vnnd dy stette der Fürstenthümer Swidnitz Jawer, an dy Fürsten von Sachsen, ouch an Iren Herrn Vetter Herzog Wilhelm dere wegen geschreiben habenn. Vnnd zum Hayne vorsuchung an verben vnnd anderm thun gescheen ist. Das dann hynder sich gegangen ist, vnnd eyne den Dingen fil handlung gescheen.

Wy es aber entlich geblibenn vnnd verlossen, wirt hynoch folgenn.

Dy vonn Budissen haben dy zzeit den Hunt angehangen, vnnd dorjnn eynen wolgefallen gehabt, das wir der Nyderloge entwert worden. Dessgleichen dy vonn Breslaw ouch wenig bistrands dorzcu gethann habenn. Das alles eynn gute gedancken zcu nehmen ist, vnnd zcu seyner zzeit widder zcu verglichenn: Also deme gebe wir wider, hab dir das.

¹⁾ Sc. hat abgeschrieben „abigenmessenn“ und vermuthet „obigen frind“.